

ՀԱՂՈՐԳՈՒՄՆԵՐ

Վ. Արքաժառանգ

ՈՍԿԵՐՉՈՒԹՅԱՆ ՏԵԽՆՈԼՈԳԻԱՆ ՀԻՆ ՀԱՅԱՍՏԱՆՈՒՄ

Միջնադարյան Հայաստանի արհեստները, դրանց թվում ոսկերչությունը, բիշ են ուսումնասիրված: Առավել քիչ է ուսումնասիրված ոսկերչության տեխնիկան:

Ուսումնասիրել հին Հայաստանի արհեստները, նշանակում է պարզել Հայաստանի տնտեսության և կուլտուրայի հետ կապված մի շարք հարցեր: Անհրաժեշտ է ոչ միայն իմանալ, թե արհեստագործության ինչպիսի ճյուղեր են եղել, այլև այն, թե դարերի ընթացքում արհեստի յուրաքանչյուր ճյուղի համար ինչ տեխնոլոգիա է մշակվել, քանի որ վերջինս ավելի որոշակիորեն ցույց է տալիս արհեստների զարգացման աստիճանը:

Հայ և օտար պատմիչների վկայություններից երևում է, որ Հայաստանը հարուստ է եղել ոչ միայն երկաթի, պղնձի, այլև ոսկու, արծաթի հանքերով: Հնագիտական նյութերն էլ ցույց են տալիս, որ մետաղամշակումը հայկական բարձրավանդակի բնիկների մոտ գոյություն է ունեցել դեռևս հնագույն դարերում և հանդիսացել է ամենակարևոր և ամենից շատ տարածված ու զարգացած արհեստի ճյուղերից մեկը:

Երբ Հայաստանում դեռևս քաղաքային կյանքը զարգացած չէր, մետաղագործ արհեստավորը պատրաստում էր թե՛ գյուղատնտեսական իրեր՝ գութան, րա՛հ, մանգաղ, քլունգ, թե՛ տնային գործածության իրեր և թե՛ սառը զենքեր ու զարդեր:

Հետագայում, 9-րդ դարից հետո, քաղաքային կյանքի զարգացման հետևանքով բուռն վերելք է ապրում նաև արհեստագործությունը: Խորանում է արհեստագործության մեջ գոյություն ունեցող աշխատանքի բաժանումը և արհեստների առանձին ճյուղերի մասնագիտացումը: Ոսկերիչ վարպետները սեփական թավարաբեին ադնվականության և գերազանցապես քաղաքային դասի սճող պահանջները՝ պատրաստելով ամեն տեսակի մետաղյա զարդեր ու իրեր, թե՛ տեղական շուկայի և թե՛ արտահանման համար: Եթե առաջ դարբինն ինքն էր միայն պատրաստում երկաթյա, պղնձյա և նույնիսկ արծաթյա ու ոսկյա լազմատեսակ իրեր ու զարդեր, այժմ նա հաղիվ հնարավորություն ուներ բավարարելու գյուղատնտեսական գործիքների աճած պահանջները: Աշխատանքի բաժանման հետևանքով առաջանում են արհեստի առանձին ճյուղեր՝ «կողպայրարարներ» (փականագործներ), պայտարներ, «սլեհարարներ» (զինագործներ), ոսկերիչներ և այլն: Պարզ է, որ «կողպայրարարը», «սլեհարարը», պայտարը և ոսկերիչն արդեն այլևս չեն զբաղվում գյուղատնտեսական գործիքներ պատրաստելով:

Արհեստների մասնագիտացման համար, որպես լավագույն տեղեկատու կարող է ծառայել Երևանի Պետական Մատենադարանի № 695 ձեռագիրը:

Այս ժողովածուի 187 էջում գետեղված է 1221 թվականին արաբերենից հայերենի թարգմանված մի երազահանի հատվածը, որտեղ կան հարուստ տեղեկություններ 13-րդ դարի արհեստների մասին: Այնտեղ արտահայտված է նաև բնակչության կարծիքն այս կամ այն արհեստի և արհեստավորի վերաբերյալ: Հետաքրքրական է այդ փաստաթղթում մետաղագործությանը վերաբերող հատվածը.

«Ձինչ արուէստ կա, որ կու բանի հանց ասեն դարբին տեսանես յերազի մեծ մարդ է... սլեհարար հանց լինի որ օգնական է... նալբանդն յայլոցն լաւարար մարդ լինի. կողպայքարարը առաջնորդ մարդ լինի... պղնձագործն հաւատացեալ մարդ է և շարշարկոտ... ոսկերիչն՝ ստախօս»¹:

Այս քաղվածքից որոշակի գաղափար կարելի է կազմել 13-րդ դարում գոյություն ունեցող մետաղամշակման առանձին էյուղերի մասին:

Ոսկերիչ արհեստավորները, ոչ միայն հնում, այլև 17—19-րդ դարերում զարդեր կամ այլ իրեր պատրաստելու ժամանակ, բացի ոսկուց և արծաթից օգտագործել են նաև պղինձ, վարշաղ և այլ նյութեր, որոնցից պատրաստված զարդարանքներն էժան և մատչելի էին ժողովրդի հասարակ խավերին:

Ոսկերիչները մշակել էին ոսկուց, արծաթից իրեր, զարդեր պատրաստելու մի շարք տեխնիկական ձևեր ու եղանակներ, որոնց ծանոթանջնելուն է նվիրված սույն հոդվածը:

Ձուլման տեխնիկան.— Ինչպես մետաղագործության մյուս էյուղերում, այնպես էլ ոսկերչության մեջ արդուզարդերի և իրերի որոշ մասը պատրաստել են ձուլման եղանակով, որը գոյություն ունեն դեռևս բրոնզե դարում: Ձուլման եղանակը ոչ միայն հին է, այլև եղել է գերիշխող: Այդ մեթոդով աշխատել են թե՛ գյուղական դարբինները, որոնք միաժամանակ ոսկերչի դուրժ էին կատարում. և թե՛ ղղյակներում, վանքերում ու քաղաքներում կենտրոնացած ոսկերիչ արհեստավորները: Ձուլման համար ոսկերիչ վարպետներն օգտագործել են տարբեր տեսակի կաղապարներ: Կաղապարներից հնագույնը, որն օգտագործվել է բրոնզե դարում, պատրաստվում էր քարից կամ կավից:

Քարե կաղապարները լինում էին մեկ երեսանի և երկու երեսանի: Այն իրերը կամ զարդերը, որոնց մի կողմը հարթ էր և պարզ, ձուլում էին մեկ երեսանի քարե կաղապարով: Ոսկերիչ վարպետը սկզբից քարի վրա փորում էր ձուլվող իրի մոդելը, որը բավականին բարդ և դժվարությունների հետ կապված աշխատանք էր: Մոդելը պատրաստելուց հետո ձուլվածքը լցնում էր կաղապարի վրա եղած հատուկ անցքից, որ մեծ մասամբ լինում էր ձազարածև: Շատ հաճախ մեկ երեսանի քարե կաղապարներն իրենց վրա չէին ունենում ձուլվածքը լցնելու նման հարմարանք, այդ դեպքում հալած հեղուկ լցնող անոթն իր վրա ունենում էր այնպիսի հարմարանք, որը հնարավոր էր դարձնում հալված մետաղը պահանջված չափով լցնել կաղապարի մեջ:


Մինչև այժմ հայտնի հնագույն կաղապարը հայտնաբերվել է Շնդավիթի 1937 թ. պեղումներից, դա պատկանում է 2-րդ հազարամյակի սկզբներին (ն. ք. մ. թ.): 1936 թ. Մուխաննաթ-Թափայի պեղումների ժամանակ վերին շերտում ջարդված ամանի մեջ պրիմիտիվ մի հնոցի կողքին գտնվեց մի կաղապար, որով ձուլել են մեղալիոն, հերոն և կրծքի զարդ²:

¹ Սրեանի Պետական Մատենադարանի № 695 ձեռագիր, էջ 187:

² Տեղեկագիր Պատմություն և դրականություն ինստիտուտի, առաջին դիրք, 1938, էջ 214:

Սակր ձուլելու կաղապարներ գտնվել են Կարմիր բլուրից և Լենինականի մսի կոմբինատի շինարարական աշխատանքների ժամանակ բացված հնավայրերից:

Դամբարաններից հայտնաբերված իրերը ցույց են տալիս, որ կանացի զարդարանքները, սակրերը, սաուր զենքերից՝ փոքր և մեծ նիզակները, նետերը, դաշույններն իրենց դաստակներով, բրոնզյա գուրգերը, ձիու սանձի մա-



Նկ. 1


1. Կաղապար Շնդավթի պեղումներից:
2. Կաղապար՝ ուլունք, մեղալիոն և հերուն ձուլելու համար (Մուխանյան-Թափաշից):
3. Կաղապար սակրի (Լենինականից):
4. Կաղապար սակրի / Կարմիր բլուրից):

Նկար 11. Պատրիկի

սերը, արձանիկները, կրժքի կապիչները, բուրգածև մատանիները և այլ իրեր պատրաստվել են ձուլման եղանակով՝ կրկնափեղկ կաղապարի միջոցով, որոնք անպայման ունեցել են մետաղյա հեղուկ լցնելու համար ձաշարաձև հարմարանք:

Միջնադարյան Հայաստանում ոսկերչության մեջ, բացի քարե կաղապարից, շատ տարածված և գործածական էր նաև այն կաղապարը, որը պատրաստվում էր հատուկ հողից և գործածվում էր մինչև մեր օրերը: Այդ կաղապարը պատրաստելու համար վերցնում էին մետաղից պատրաստված 6—8 սմ բարձրություն ունեցող փոքրիկ քառակուսի արկղիկ՝ համապատասխան կափարիչով, դրա մեջ լցնում էին հատուկ մոխրագույն հող: Ոսկերիչ վարպետը ցանկացած իրի համար պատրաստում էր մոդելներ՝ կապարից, պղնձից և մոմից: Բարդ հատիկավոր զարդալուսքներ պատրաստելիս անպայման ռետադործում էին մոմից պատրաստած մոդելներ:

Եթե ոսկերիչը ցանկանում էր ձուլել ձեռքի ապարանջան, մատանի կամ խաչ և այլ իրեր, վերցնում էր հատուկ հողով լցված կրկնափեղկ արկղը, ապա կապարից կամ պղնձից պատրաստած մոդելի միջոցով հողի վրա հանում էր պահանջվող զարդերի պատճենը, այնուհետև կաղապարի վրա եղած ձագարածն անցքից լցնում մետաղյա հեղուկը՝ հրակայուն կավից պատրաստված տարրեր մեծության անոթներից: Կաղապարի մեջ լցրած հեղուկ ձուլվածքը թռչնվում էր մինչև սառչելը, որից հետո ոսկերիչը հանում էր պատրաստի իրը և ցանկացած դեպքում հատուկ դործիքներով նրա վրա փորադրում պահանջվող նախշերը:



- Նկ. 2
1. Մետաղյա կաղապար:
 2. Ոսկերչի հայոց այժմյան տիպի:
 3. Ոսկերչի հայոց Դվինից:
 4. Կաղապար ձողերի համար:
- Նկար Ա. Պատրիկի

Հողի կաղապարի միջոցով հնարավոր էր կարճ ժամանակամիջոցում ձուլել մեծ քանակությամբ զարդեր և այլ իրեր: Ձուլման տեխնիկայով հն պատրաստված Կիրովականի թագավորանիստ կոչված վայրի դամբարաններից դուրս մի արծաթյա ապարանջան և ոսկյա մի մատանի, որն իր վրա ունի չորս ոսկյա փնդիկներ՝ ալի փոխարեն: Այդ ապարանջանը և մատանին գտնվում են Պետական Պատմական թանգարանում (№ № 1533 և 1544): Նույն նշանակով է պատրաստված մարդկանց և կենդանիների արձանիկները բրոնզից, ինչպես, օրինակ, Ադրյամանի իշխանական զամբարանում գտնված

բրոնզյա եղջերուն, Վանում գտնված կնոջ կերպարանքով արձանիկը, Կարմիր լիւրում գտնված Թեյշերա աստծու արձանիկը և շատ ուրիշ արձաններ:

Նյութական կուլտուրայի մնացորդները հաստատում են, որ ձուլման եղանակը ոսկերչության մեջ լայն շափով կիրառվել է նաև միջնադարում: Իկե-դեցական մեծ և փոքր խաչերի, սկիհների, զանազան անոթների և նրանց վրա եղած վերադիր նախշերի մեծ մասը ձուլածո են: Ձուլածո խաչերի բազմաթիվ օրինակներ գտնվել են Անիի պեղումներից, որոնք պատրաստված էին թե՛ պղնձից, և թե՛ արծաթից: Այդ խաչերից շատերի վրա ոսկերիչ վարպետը ձուլելուց հետո կատարել է փորագրություններ և կամ թանկարժեք քարերով զարդարել է դրանք:

1949 թվականին՝ Դվինի պեղումների ժամանակ, Կաթողիկեի հարավ-արևելյան կողմում գտնվեց արծաթյա մի խաչ, որի շորս թևերի անկյունների վրա կան գնդիկանման հավելվածներ, որոնք հաստատում են, որ այդ խաչը պատրաստված է ձուլման եղանակով: Արծաթյա խաչի հետ գտնվեցին նաև արծաթից երկու մատանիներ, նույնպես պատրաստված ձուլման եղանակով:

9-րդ դարից հետո ձուլման տեխնիկայով պատրաստվել են կանացի դարձարանքների մեծ մասը, որովհետև շուկայի համար անհրաժեշտ էին արագ պատրաստվող և ստանդարտ իրեր, որոնց պահանջը զգուժ էր ոչ միայն ազնվական դասը, այլև քաղաքի, մասամբ և գյուղի բնակչությունը: Մեծ քանակությամբ ձուլածո զարդեր ունենք թանգարանում, որոնք պատկանում են 17—19-րդ դարերին: Ձուլման եղանակով են պատրաստված այն բոլոր բրոնզյա, երկաթյա, արծաթյա և ոսկյա մատանիները, որոնց ակն ագուցանելու մասը հաստ էր և բուրդաձև:

1951 թվականին՝ ընկ. Բ. Առաքելյանի ղեկավարությամբ Գառնիում կատարված պեղումների ժամանակ գտնվել են արծաթյա զեմմա մատանիներ, որոնք նույնպես պատրաստվել են ձուլման եղանակով և ծառայել են որպես կնիք վավերագրեր, մուրհակներ և նամակներ կնքելու համար: Այդպիսի մատանիների ակի մասերը բուրդաձև են և կողքից ունեն ոսկուց պատրաստված զնդաձև հավելվածք՝ բավականին դուրս ընկած ձևով, որը հեշտացնում է կնքելը: Նման ոսկյա մի մատանի, որ պատկանում է 16-րդ դարին, գտնվել է 1937 թվականին Նորագավթում՝ հողային աշխատանքների ժամանակ: Այս մատանին ունի մեծ քառանկյունի սպիտակավուն ակ, որի վրա հայերեն տառերով գրված մակագրությունից երևում է, որ սեփականություն է եղել հարուստ մի հայ վաճառականի և ծառայել է վավերագրեր և մուրհակներ կնքելու համար:

Ձուլման եղանակով են պատրաստված մեր ձեռագրերի արծաթյա կազմերի որոշ մասը և հատկապես նրանց վրա եղած վերադիր զարդերը, որոնք մեծ մասամբ բուսական օրնամենտներ և կրոնական դիմանկարներ են: Պետք է նշել, նաև, որ անկախ այն բանից, թե ինչ տեխնիկայով են պատրաստված այդ արծաթյա կազմերը, բոլոր դեպքերում վարպետներն աշխատել են նրանց վրա դնել ձուլածո զարդեր և պատկերներ:

Բազմաթիվ օրինակներից անհրաժեշտ է հիշել մի քանի ձեռագրեր, որոնց վրա օգտագործվել են ձուլված վերադիր զարդեր, ինչպես, օրինակ, № 5592 ձեռագիրը, որ պատրաստված է դրվագման եղանակով և իր վրա ունի վերադիր նախշեր՝ կրոնական պատկերներ և բուսական զարդեր: Նույնանման

Հուլաժո վերադիր զարդեր մենք տեսնում ենք նաև № 5651 ձեռագրի արծաթ-
յա կազմի և № 7775 (սևադի), № 6763 (էմալի) արծաթյա կազմերի և բազ-
մաթիվ այլ ձեռագրերի կազմերի վրա: Այդ վերադիր զարդերը և զիմանկար-
ները մասսայական ձեռով պատրաստվում և օգտագործվում էին ոչ միայն ձե-
ռագրերի կազմերը, այլև եկեղեցական սպասները, վակասները, մեռոնի
ամանները, ցնձուղները, քուրվառները զարդարելու համար:

Կոեկու և զրվագման տեխնիկան. — Հին Հայաստանում ոսկերիչ արհեստավորները ձուլման տեխնիկայի հետ միասին կիրառել են նաև կոեկու և զրվադեկու տեխնիկան: Այս տեխնիկայի հնագույն լինելը հաստատվում է քարարկղե դամբարաններից հայտնաբերված իրերով և զարդերով: Եթե ձուլման եղանակով որևէ իր կամ զարդ պատրաստելու ժամանակ պահանջվում էր մեծ քանակությամբ մետաղ, ապա զրվագման միջոցով ոսկյա կամ արծաթյա իրերու զարդեր պատրաստելու ժամանակ գործածվում էր ավելի քիչ քանակությամբ ազնիվ մետաղ և ստացվում էր ավելի շատ իր, որովհետև ոսկերչի մուրճի հարվածների տակ ոռկյա, արծաթյա կամ պղնձյա թերթիկներն ավելի նրբանում և խտանում էին:

Կոեւոյ եւ դրվագման տեխնիկան սերտորեն կապված են իրար հետ. սկզբում ոսկերիչը կամ արծաթագործը կոեւոյ միջոցով պետք է պատրաստեր դրվագման ենթակա իրի կմախքը եւ ապա անցնէր արտաքին գեղարվեստական ձևավորմանը: Շատ հաճախ պատրաստում էին այնպիսի իրեր, որոնք պահանջում էին միայն կոեւոյ աշխատանք եւ հարկ չէր լինում արտաքին ձևավորման: Կոեւոյ տեխնիկայով են պատրաստվել ոչ միայն զենքեր ու գլուխաւոր տեսական գործիքներ, այլեւ կանացի զարդերի որոշ մասը, ինչպէս, օրինակ. ապարանջաններ, հատկապէս լայն տեսակի, կրծքի զարդեր, ւախենքեր, բաժակներ եւ անգամ եկեղեցական իրերի մի մասը՝ սկիհներ, մեռուխ ամաններ եւ այլն:

Ոսկերչության մեջ զրվագման ամենահաղույն շրինակը հայտնաբերվել է Կիրովական քաղաքում 1948 թվականի շինարարական աշխատանքի ժամանակ բացված կուրգանում*։ Այդ պեղումների՝ ժամանակ հայտնաբերվեցին մ. թ. ա. 2-րդ հազարամյակի կեսին պատկանող մի շարք իրեր և զենքեր՝ բրոնզից, կավից և քարից, որոնց հետ գտնվեցին նաև ոսկուց և արծաթից պատրաստված տարբեր ձևի անոթներ։ Այդ անոթների թվին պատկանող մի ոսկյա բաժակի վրա ոսկերիչ վարպետը զրվագել էր 6 աուլոծների քանդակներ

Անհրաժեշտ է նշել, որ գրվագման տեխնիկան կապված է մեծ դժվարությունների հետ և պահանջում է փորձառություն և համբերատարություն: Ոսկերիչ վարպետները գրվագումը կատարում էին հատուկ գործիքներով և տարբեր մուրճերով, հատկապես արծաթյա իրերի գրվագման ժամանակ, որն ալմեյի տարածված էր: Այսպես, բաժակները, ափսեները, սափորները, ղանազան տեսակի տուփեր, կանաչի զլխի թափակներ և կրծքի զարդարանքների մեծ մասը պատրաստում էին արծաթից, որը համեմատաբար էժան կը և մատչելի շուկայական սպառման համար: Ոսկերիչը ոսկին օգտագործում էր այն ժամանակ, երբ թագավորների, իշխանների, առևտրական դասի հարուստ ներկայացուցիչների կողմից տրվում էր հատուկ պատվեր:


* Պեղման աշխատանքները ղեկավարել է Բ. Բ. Պրոսորովսկին: Մասնակցել են պատմ. գիտ. թեկնածուներ Բուկ. Դեկ. Արմ. Միրզոյանը, Վ. Արքաճաճյանը և Ն. Նիկոլայանը: Պեղման արդյունքներին մասին ղեկավարել է Բ. Բ. Պրոսորովսկին:

Միջնադարում և ավելի ուշ շրջանում դրվագումը կատարվում էր մի քանի տեսակ՝ մանր օրնամենտների դրվագում, հարթ դրվագում և ուռուցիկ (ռելեֆ) դրվագում:

Ինչպես ասացինք, նախքան դրվագելը ոսկերիչը կռելու միջոցով պատրաստում էր իրը, որից հետո ձեռնարկում էր արտաքին ձևավորման, սակայն պատահում էր նաև, որ ոսկերիչը նախ մետաղյա թերթիկի վրա դրվագում էր քանդակը և ապա կռելու միջոցով պատրաստում ցանկացած իրը: Պետք է ասել, որ այս վերջին միջոցը քիչ էր կիրառվում ոսկերչության մեջ, որովհետև դրվագումից հետո, կռելու ժամանակ քանդակները կարող էին վնասվել: Ըրվագման միջոցով սովորաբար ոսկերիչը կարող էր պատրաստել այնպիսի իր, որի վրա կիրառված լինեն միայն հարթ կամ մանր քանդակներ: Բայց հանդիպում ենք նաև այնպիսի իրերի, որոնց վրա դրվագված են ոչ միայն պարզ օրնամենտներ, այլև ուռուցիկ զարդանկարներ: Մանր տեսակի օրնամենտներ կիրառվում էին մեծ մասամբ եզրանախշերի ժամանակ: Մանր օրնամենտների համար կային հատուկ գործիքներ՝ նման ձողերի, այդ գործիքների ծայրերին պատրաստված էին զանազան տեսակի օրնամենտների մոդելները, փոքրիկ վարդանախշերով՝ կլոր շրջանակներ, փոս ընկած, ուռուցիկ, որոնք դասավորված էին երբեմն եռանկյունի կամ բառանկյունի ձևով: Եթե ոսկերիչը ցանկանում էր բաժակի կամ թասի շուրջը զարդարել մանր օրնամենտներով, նախքան իրը պատրաստելը, արծաթյա կամ ոսկյա թերթիկի վրա մուրճի հարվածներով դրոշմում էր պողպատյա ձողիկների վրա և դած օրնամենտները:

Եթե ոսկերիչը ցանկանում էր որևէ իրի վրա դրվաչել ուռուցիկ երկրաչափական, բուսական կամ կենդանական օրնամենտներ, այդ դեպքում ցնդասեղի ծայրերով ամբողջ քանդակը պատկերում էր մետաղյա իրի վրա, երբեմն էլ ոսկերչական հատուկ զրչի ծայրով գծում ցանկացած քանդակը, ապա ոսկերիչը փոքրիկ մուրճի հարվածներով ծեծում էր իրը, մինչև որ գծված քանդակը ամբողջությամբ փոխանցվեր նրա վրա: Քանդակի դրվագումը վերջացնելուց հետո վարպետն ուղիղ երեսից խորացնում և ավելի ռելեֆ էր դարձնում այն: Սակայն կային օրնամենտներ, որոնց համար պահանջվում էր կրկնակի դրվագում, այսինքն, իրի թե՛ ներսից և թե՛ դրսից: Այդ դեպքում վարպետն օրնամենտների մի մասը ներսի կողմից մուրճով հարվածում և ստանում էր ռելեֆ օրնամենտներ, իսկ այն մասը, որտեղ քանդակը ներս ընկած պետք է լիներ, մուրճի հարվածները տրվում էին դրսի կողմից: Երկու դեպքում էլ թե՛ ներսի և թե՛ դրսի կողմից իրը ծածկվում էր սև ձութով՝ մուրճի հարվածներից մետաղը պաշտպանելու համար:

Հայաստանում թե՛ քարարկղե դամբարաններից և թե՛ ուրարտական չժրջանին պատկանող վայրերից հայտնաբերվել են մի շարք իրեր՝ ոսկուց, արծաթից, բրոնզից, որոնք պատրաստված են դրվագման եղանակով: Այդ իրերից մեկը, ինչպես ասացինք, Կիրովականի դամբարանից հայտնաբերված ոսկյա թասն է՝ առյուծի քանդակներով: 1932 թվականին Լալալանի պեղումների ժամանակ Նոր-Բայազետի շրջանի դամբարաններից մեկում պտնվել է բրոնզյա մի թաս, որի վրա դրսի կողմից դրվագման ախնիկայով պատկերված է ճառագայթաձև մի նախշ՝ նման արևի, իսկ 1929 թվականին Գոյուլիսոյի դամբարանների պեղումներից հայտնաբերվել է բրոնզյա թասակ, բայց ավելի մեծ չափի, խոր և թագի նման: Այս կանացի գլխի թասակի վրա ավելի



Նկ. 3

Դրվադման գործիքների մի քանի նմուշները ըստ Բ. Ա. Ռիբակովի
(բացի մուրճերից)։

ռելեֆ ձևով են դրվագած ակոսանման վարդեր։ Վերոհիշյալ թասը և կանացի դլխի թասակը պատկանում են առաջին հազարամյակի առաջին կեսին (մ. թ. ա.)։

Մետաղամշակումը և դրա հետ կապված ոսկերչությունը հայկական բարձրավանդակում ավելի վարգացավ և կատարելագործվեց ուրարտական շրջանում։ Ուրարտական շրջանի նյութական մնացորդները հաստատում են, որ դրվադման տեխնիկան ամենից շատ տարածված ճյուղերից է եղել։ Այդ շրջանում ոսկերիչ վարպետներն իրենց նուրբ գործիքներով սոշխատել են ոչ միայն



Նկ. 4

Ոսկյա դավաթ կիրովականից:

ոսկու և արծաթի, այլև բրոնզի վրա: Այն իրերը, որոնք հայտնաբերվել են Թուփրակ-Կալեի և Կարմիր բլուրի պեղումների ժամանակ, հաստատում են, որ Ուրարտական շրջանում ոսկերիչները գրվագման տեխնիկան կիրառել են բուսական, երկրաչափական և կենդանական քանդակներ անելու համար, իսկ ուղղանկյուն իրերի վրա մենք տեսնում ենք ուղղանկյուն բնույթի քանդակներ: Այնտեղ կենաց ծառի կողքին գրվագում էին ուղղանկյուններ, հեծյալներ և անգամ վիշապների պատկերներ: Դրվագման լավագույն օրինակներ կարող են ծառայել Կարմիր բլուրում գտնված սաղավարտի և կապարճի վրա եղած ուղանկյունների և ուղղանկյունների ռելեֆ քանդակները: Լավագույն ձևով գրվագած է կապարճներից մեկը, որը հայտնաբերվել է 1950 թվականին և մի վահան, որը հայտնաբերվել է 1951 թվականին պրոֆ. Բ. Բ. Պիոտրովսկու ղեկավարությամբ Կարմիր բլուրում կատարված պեղումների ժամանակ: Վահանի վրայից ու առյուծների քանդակները համեմատած սաղավարտի հետ՝ ավելի ուռուցիկ են և որոշակի. այս վահանն իր արվեստով և քանդակներով նման է Թուփրակ-Կալեյում գտնված վահանին:

Ուրարտական շրջանից հետո մեր ձեռքի տակ չունենք միջնադարին վերաբերող նյութական մնացորդներ, որպեսզի կարողանանք գաղափար կազմել այդ շրջանի ոսկերչական արվեստի մասին և պարզել Հայաստանի կապը հարևան երկրների հետ ու նրանց փոխազդեցությունը: Այդ տեսակետից Հայաստանն առաջիկա ավելի աղքատ նյութ ունի, քան նրա հարևան երկրներից Սասանյան Պարսկաստանը և Բյուզանդիան:

Դրվագման տեխնիկայով պատրաստված իրերի լավագույն նմուշներով հարուստ է նաև Վրաստանը: Այդ բանը հաստատվեց Իսևե պրոֆ. Կուֆտինի պեղումներով, որտեղից հայտնաբերված է գրվագման եղանակով պատրաստված ոսկյա բաժակ՝ նման կիրովականում գտնվածին և դուլյանման անոթներ՝ ար-

ծաթից. դարձյալ դրվագած: Այդ իրերը գտնվել են Կուրգանից և պատկանում են երկրորդ հազարամյակի կեսին (ն. թ. մ. թ.):¹

Դրվագման լավ օրինակներ հայտնաբերվել են նաև Արմաղիի պեղումնե-րից. որոնք մեզ դադափար են տալիս հելլենիստական շրջանի ոսկերչական արվեստի մասին: Պետք է նշել, որ դրվագման տեխնիկայով պատրաստված իրերի լավագույն նմուշներ են գտնվել նաև Ռուսաստանում (9—15-րդ դարե-րին վերաբերող):²

Վերահիշյալ փաստերը ցույց են տալիս, որ Հայաստանի անմիջական հարևան և նրա հետ կապ ունեցող երկրներում, ոսկերչական արհեստում դըր-վագման տեխնիկան զարգացած և ամենից շատ տարածված ճյուղերից մեկն է եղել:

Չնայած այն բանին, որ մենք միջնադարյան Հայաստանում դրվագման լավագույն օրինակներ դեռևս չունենք, սակայն մեր պատմիչների հաղորդած տեղեկությունները՝ թագավորների և իշխանների, հարուստ խնճուքների մա-սին, որտեղ գործածվում էին ոսկյա պնակներ և բաժակներ, մեզ ենթադրել են տալիս, որ այդ իրերն անշուշտ ունեցել են իրենց վրա զանազան տեսակի քանդակներ:

Հայաստանի Պետական Պատմական թանգարանը և Ձեռագրատունը հա-րուստ են 17—19-րդ դարերին պատկանող ոսկերչական լավագույն նմուշնե-րով, որոնցից կարելի է եզրակացնել, որ միջնադարյան Հայաստանում ևս այդ արհեստը բավականաչափ զարգացած է եղել: Մենք համոզված ենք, որ նոր պեղումները կզան հաստատելու մեր այդ ենթադրությունը: Հայաստանի ոսկերիչների դրվագման լավագույն նմուշներն են հանդիսանում Մատե-նադարանում գտնվող ձեռագրերի արծաթյա և ոսկյա կազմերը, որոնց որոշ մասը պատրաստված է դրվագման տեխնիկայով:

Մատենադարանի 15-րդ դարին պատկանող № 6792 ձեռագրի կազմը ար-ծաթից է և պատկանում է ավելի ուշ շրջանին: Նա պատրաստված է դրվագման եղանակով: Դրվագման լավ օրինակներից է նաև № 5580 ձեռագիրը, գրված 1622 թվականին՝ Բաղեշում. նրա արծաթյա կազմի վրա կատարված է թե՛ դրվագման և թե՛ փորագրական աշխատանք: Ձեռագրի կազմը պատրաստված է 1730 թվականին, սակայն կաշվե կազմի վրա եղած հետքերից երևում է, որ մինչև այդ նոր արծաթյա կազմը, ձեռագիրն ունեցել է արծաթյա հին կազմ, որը հետագայում կողոպտվել է կամ ոչնչացվել, այդ հաստատվում է կաղմի ներսի կողմում մնացած արծաթյա մեխիկների մնացորդներով:

Դրվագման լավագույն նմուշներից է № 9273 ձեռագիրը, որի հիշատակա-րանից երևում է, որ այդ ավետարանը գրվել է 1494 թվականին, Գրիգոր արեղայի ձեռքով: Կազմի առաջին երեսի վրա ոսկերիչ վարպետը շատ ռելեֆ ձևով դրվագել է Քրիստոսի պատկերը հիվանդներին բժշկելիս: Ավետարանի կազմի շորս կողմերին դրվագած են բուսական քանդակներ, որոնց մեջ վեց թևանի թերթիկներով ծաղիկը շատ տարածված մոտիվ էր այդ դարերին: Կան ձեռագրերի կազմեր, որոնք պատրաստված են կրկնակի դրվագման եղանա-կով, այդպիսին է № 5653 ձեռագրի արծաթյա կազմը: Այս ձեռագրի կազմի երկու երեսներին դրվագած են նույն օրնամենտները: Կենտրոնում սրտաձև


¹ К у ф т и н, Археологические раскопки в Триаleti, 1941. Тбилиси, стр. 62.

² Г. А. Р ы б а к о в, Ремесло древней Руси, 1948, стр. 291.

զարդ, մեջտեղում կիսալուսին, վրան՝ փոքրիկ խաչ: Կազմի վրա ելաձ փորագրությունից պարզվում է, որ այդ ձեռագիրն արժաթապատված է 1781 թվականին՝ վանեցի Պետրոս վարդապետի պահանջով: Այս արվեստով պատրաստված ձեռագրերի բազմաթիվ նմուշներ պահպանվում են Մատենադարանում:

Թվարկված օրինակները բավական են եզրակացնելու, որ միջնադարյան Հայաստանում նույնպես տարածված պետք է լիներ դրվագման տեխնիկան՝ մանավանդ ձեռագրերի մետաղազարդ կազմի և եկեղեցական պիտույքների պատրաստման գործում:

15-րդ դարից հետո կրկնակի դրվագման տեխնիկայի լավագույն օրինակներ մենք տեսնում ենք կանացի գլխի թասակների վրա, այդ թասակները պատրաստվում էին մեծ մասամբ արծաթից կամ վարչադից, շատ հազվադեպ դեպքում ոսկեզօծում էին: Հայ ոսկերիչները այդ թասակները զարդարում էին բուսական քանդակներով կամ կրոնական բնույթի վարդերով:



Նկ. 5

Արծաթյա թասակ կանանց գլխի:

Այդ տեսակետից հետաքրքիր մի նմուշ է 18-րդ դարում Արևմտյան Հայաստանում պատրաստված թասակը՝ քանդակված կրկնակի դրվագման եղանակով: Նման գլխի թասակներ մինչև 20-րդ դարի սկզբները հայ գեղջկուհիները կրել են իրենց գլխներին, որպես վարդարանք:

Բացի թասակներից՝ Հայաստանի ոսկերիչները կրկնակի դրվագուման եղանակով պատրաստում էին զանազան տեսակի տուփեր, անոթներ, ափսեներ, բաժակներ, ձեռքի հայելիների պահպանակներ, որոնց վրա փորագրում և դրվագում էին ոչ միայն բուսական և երկրաչափական օրնամենտներ, այլև քանդակում էին խնճուկքի, որսի տեսարաններ, պատմական ու առասպելական թեմաներ:

Մեր ձեռքի տակ եղած նյութական մնացորդներից երևում է, որ միջնադարյան Հայաստանում ոսկերչության մեջ ամենից շատ տարածված են եղել բուսական քանդակները՝ հատկապես վեց թևանի և ութ թևանի ծաղիկները, խաղողի բղկուղը, նռան ու նուշի հատիկները և այլն:

Դրոշմելու (շտամպի) տեխնիկան.—Ոսկերչության մեջ, դրվագումից բացի շատ տարածված էր նաև դրոշմելու տեխնիկան: Այդ տեխնիկան իր արվեստով նման է դրվագուման տեխնիկային, որ հետագա դարերում ավելի լայն ձևով կիրառվել է և փոխարինել նրան: Եթե դրվագուման եղանակով որևիցե իր կամ զարդ պատրաստելու համար պահանջվում է երկարատև աշխատանք, յուրաքանչյուր օրինակի համար առանձին գծագրություն և ապա մուրճի բազմաթիվ հարվածներից հետո միայն նկարված քանդակն արտահայտվում էր արծաթյա կամ ոսկյա թերթիկի վրա, ապա դրոշմելու տեխնիկան այդ դժվարությունը շուտով Միատեսակ օրնամենտ ունեցող մեծաքանակ իրեր պատրաստելու համար անհրաժեշտ էր միայն մի մոդել, որից յուրաքանչյուր անգամ մուրճի մեկ հարվածով ստացվում էր մեկ օրինակ: Այս ձևով աշխատելն ավելի արդյունավետ էր դառնում, որովհետև կարճ ժամանակամիջոցում մեծ քանակությամբ զարդեր ու դրամներ կարելի էր պատրաստել: Դրոշմելու տեխնիկայի ժամանակ, սակայն, պահանջվում էին ավելի նուրբ մետաղյա թերթիկներ, որպեսզի մեկ հարվածից հետո քանդակի ուղեփոխությունն ուժեղ ձևով արտահայտվեր:

Բոլոր տեսակի դրամները թե՛ հնում և թե՛ միջնադարում, պատրաստում էին դրոշմելու եղանակով: Հայաստանը նույնպես կտրել է իր սեփական դրամը՝ դեռևս Արտաշեսյան դինաստիայի ժամանակ (Տիգրանի և Արտավազդի դրամները): Այդ ցույց է տալիս, որ Հայաստանի ոսկերիչներն առաջին դարում (նախքան մ. թ.) ծանոթ են եղել դրոշմելու տեխնիկայիս և կիրառել են այն ոչ միայն դրամներ կոելու համար, այլև կանանց նուրբ զարդեր պատրաստելու ժամանակ:

Դրամ պատրաստելու համար անհրաժեշտ էր ունենալ դրամի երկու երեսների համար առանձին մոդելներ: Դրամի մեկ երեսի զարդի մոդելը փորագրում էին կապարից պատրաստված առանձին ձողի մակերեսին, որի վրա դրվում էր դրամի համար նախատեսված ոսկյա կամ արծաթյա թերթիկը, իսկ դրամի մյուս երեսի մոդելը փոխադրվում էր հարվածող ձողի վրա: Այդ նախապատրաստական պրոցեսից հետո, մեկ հարվածով արծաթյա կամ ոսկյա թերթիկի վրա պատկերվում էին երկու երեսների վրա եղած զարդանախշերը: Բացի դրանից՝ դրոշմելու տեխնիկայով պատրաստում էին նաև մեղալիոններ, կանացի կրծքի նուրբ զարդարանքներ, ապարանջաններ, ականջօղեր:

Դրոշմելու եղանակով պատրաստված ոսկյա և արծաթյա զարդերի մեջ ամենահանդույնները, որ մեր ձեռքն են հասել պեղումներից, Օձունի դամբարանից հայտնաբերված արծաթյա թերթիկը և ոսկյա մեղալիոնն են, որոնք պատրաստված են հատուկ մոդելի միջոցով:

Դրոշմելու տեխնիկայով է պատրաստված Թուփրակ-Կալեից հայտնաբերված ոսկյա մեղալիոնը՝ կանացի պատկերաքանդակով։ Բացի դրանից հելլենիստական շրջանի մեղալիոններ հայտնաբերվել են նոր Բայազետի Փաշաքյանդ դյուղից և Արմավիրի ավերակներից։

Դվինի պեղումներից հայտնաբերված ոսկյա զարդարանքները ցույց էն տալիս, որ դրոշմելու տեխնիկան կիրառվել է ոսկերչության մեջ ոչ միայն հնագույն և հելլենիստական շրջանում, այլև՝ միջնադարում։ Դրոշմելու տեխնիկայով է պատրաստված 1950 թ. Դվինի պեղումների ժամանակ միջնաբերդից հայտնաբերված կրծքի ոսկյա նուրբ զարդը, որի վրա կան ութ թևանի վարդանման զարդանախշեր։ Ավելի նուրբ աշխատանքի նմուշ է պեղումների ժամանակ գտնված մի ուրիշ ոսկե զարդարանքի մասը, որի վրա շատ պարզ երևում է սրտաձև ուռուցիկ մի քանդակ՝ կատարված դրոշմելու միջոցով։


17—19-րդ դդ. պատկանող ոսկյա և արծաթյա զարդերի վրա նույնպես նկատելի է դրոշմելու տեխնիկան։ Այդպիսի զարդերի լավագույն օրինակներ դտնվում են Պետ. Պատմական թանգարանում։

Հատիկի և Իելի հյուսվածքի տեխնիկան.— Ոսկերչության կարևոր ճյուղերից է հատիկավոր և թելի (Фигурный) տեխնիկան, որը նույնպես հնագույն է համարվում։ Հատիկավոր տեխնիկայի աշխատանքը սերտորեն կապված է ոսկյա և արծաթյա թելերի հյուսվածքի տեխնիկայի հետ և նրա հնագույն լինելը հաստատվում է Հայաստանի պեղումներից հայտնաբերված ոսկյա և արծաթյա զարդերով։ Դրանցից անհամեմատ ավելի շատ նմուշներ ունենք գտնված թե՛ դամբարաններից և թե՛ միջնադարյան առևտրա-արհեստավորական կենտրոն Դվին քաղաքի պեղումներից, որը եղել է ոսկերչության հնագույն օջախներից մեկը։ Թելի և հատիկավոր աշխատանքի համար պահանջվող գործիքներն անհամեմատ ավելի քիչ են։ Ամենակարևոր գործիքը պողպատյա սալիկն է՝ անցքերով (թելքաշ, հադիդա) 1 մմ-ից մինչև 6 մմ. այդ անցքերի միջոցով ամենահաստ ոսկյա կամ արծաթյա լարից կարելի է հյուսվածքի համար ստանալ ամենաբարակ թել։ Մյուս կարևոր գործիքը երկբերան ունելին է, որի մի բերանն ավելի լայն է, որպեսզի հեշտությամբ հնարավոր լինի հատիկները շարել և թելից հյուսել ցանկացած օրնամենտը։ Մյուս գործիքներից են սալը, զանազան չափսի բրիչներ, հալոցքի անոթը, թել ոլորող սալը, ալրող ճրագը և այլն։

Նախքան իրը պատրաստելը ոսկերիչը պետք է պատրաստեր զանազան չափի հատիկներ և հյուսվածքի համար բարակ թելեր՝ ոսկուց կամ արծաթից։ Միջնադարում այդ աշխատանքը կատարվում էր ավելի պրիմիտիվ ձևով։ Դրա համար ոսկերիչը մաքուր ոսկուց կամ արծաթից պատրաստում էր երկար լարեր՝ թելքաշի օգնությամբ։ Այնուհետև այդ լարերից կտրատում էր տարբեր չափի մասեր և ապա շարում հատուկ անոթի մեջ՝ ածխի փոշու վրա, և այսպես շերտ առ շերտ դասավորելուց հետո անոթի բերանը ծածկում և թաղում էր կրակի մեջ՝ մինչև մետաղի հալվելը և կլոր գնդիկների վերածվելը։ Այնուհետև պատրաստի գնդիկները լցնում էր չրով լիքր կոնքի մեջ՝ սառեցնելու համար, հետո արծաթյա կամ ոսկյա հատիկները լվանում էր, շորացնում և պահում հատուկ տուփերի մեջ՝ օգտագործելու համար։ Ինչպես հատիկները, այնպես էլ բարակ թելերը պատրաստվում էին զփվարությամբ։ Նախ և առաջ մետաղյա ձողն անց էին կացնում պողպատյա սալիկի տարբեր չափսի անց-

քերով, մինչև ամենարարակ թել ստանալը, որից հետո փաթաթում էին հա-
տուկ կոճերի վրա:

Ոսկու կամ արծաթի թելերով ու հատիկներով էին զարդարում միջնադար-
յան ոսկյա կամ արծաթյա քաժակները, բաժակակալները, հարսանեկան զա-
նազան տեսակի տուփեր, կանացի զարդարանքներ, դուռիներ, ապարճնջան-
ներ, ականջի օղեր, կրծքի քորոցներ և այլն:



Նկ. 8

Հատիկի և թելի հյուսվածքի ոսկերչական գործիքներ:

Նկար Ա. Պատրիկի


Ոսկերիչ վարպետը եթե ցանկանում էր բաժակը զարդարել հյուսածո
արվեստով, նախօրոք պատրաստում էր իրի կմախքը կռելու եղանակով և
ապա ոսկու թելերով ու հատիկներով հյուսում բուսական ֆանդակներ:

Հատիկավոր գործի հնագույն նմուշներ գտնվել են Կիրովականի թագավո-
րանիստ և Դիմացի-թաղ կոչվող դամբարաններում և Մարտունու շրջանի Ագի-
յաման գյուղում հայտնաբերված դամբարաններից մեկում: Ագիյամանի դամ-
բարանում գտնված զարդը կազմված է երկու կտորից, հավանաբար ականջօղի
երկու կտորներ են, որոնց վրա վարպետը հատիկներով կազմել է եռանկյունի-
ներ, մի բան, որ շատ տարածված էր Հայաստանում: 1952 թ. Սիսիանի շր-
ջանի Տոլորս գյուղի շրջակայքի շինարարական աշխատանքների ժամանակ
բացվեց մի մեծ և հարուստ դամբարան, որտեղ բրոնզյա հարուստ իրերի հետ
հայտնաբերվեցին նաև ոսկյա մանյակի մասեր, որոնք պատրաստված են թե-

ի և հատկավոր տեխնիկայի ամենանուրբ արվեստով*։ Նույն արվեստով մի զույգ ոսկյա ականջօղեր գտնվել են Կարմիր բլուրի պեղումների ժամանակ**։ Այդ կիսալուսնաձև ականջօղի վրա պատրաստված են երկշարք եռանկյունիներ՝ ոսկյա վերադիր հատիկներով։

Հայաստանում թելի հյուսվածքի և հատիկի տեխնիկան տարածված և զարգացած է եղել ոչ միայն հնագույն շրջանում, այլև միջնադարում, դա հաստատվում է Դվինի պեղումների ժամանակ հայտնաբերված ոսկյա զարդերով***, որոնք թելի և հատիկավոր աշխատանքի ամենանուրբ նմուշներ են։ Դվինում գտնված ոսկյա զարդերից անհրաժեշտ է նշել օձազլուխ ապարանջանը, որի վրա եռանկյունի ձևերով դասավորված են հատիկները՝ նման Ադիյամանի և Կարմիր բլուրի ականջօղերին։ Ամբողջովին թելի հյուսվածքով է պատրաստված նույն վայրում գտնված մի ականջօղ, որը զարդարված է եղել նաև թանկարժեք քարերով։

Հատիկավոր տեխնիկայի տեղական լինելը հաստատվում է նաև նրանով, որ վերջին տարիների պեղումների ընթացքում նույն արվեստով պատրաստված ոսկյա զարդեր գտնվել են նաև առաջին հազարամյակին, պատկանող քարարկղե դամբարաններից (Կիրովական), որոնք զարդարված են նույնպես եռանկյունաձև, երկշարք վերադիր հատիկներով։ Եռանկյունաձև հատիկավոր նախշերը կիրառվել են ոչ միայն ոսկյա և բրոնզյա իրերի վրա, այլև կերամիկայի վրա, մանավանդ ուրարտական շրջանում։ Դրանց տեղական լինելը ոչ մի կասկած չի կարող հարուցել։ Այդ եռանկյունաձև հատիկավոր զարդանախշերը հետագայում կիրառվել են նաև միջնադարում, ինչպես հաստատում են Դվինում գտնված ապարանջանների վրա եղած հատիկավոր զարդանախշերը։



Նկ. 7


Ապարանջան ոսկուց. Դվինի պեղումներից։

Թելի և հատիկավոր տեխնիկայով պատրաստված մեծ թվով արծաթյա զարդեր ունենք, որոնք պատկանում են 17—19-րդ դարերին։ Հյուսվածքի արվեստը ոսկերչության մեջ շատ տարածված էր էրզրումում, Տրապիզոնում, իսկ հետագա դարերում՝ Ախալցխայում։

* Սիսիանի շրջանի Տոյուրս գյուղի դամբարանի նյութերը ձեռք են բերված Թանգարանի հնագիտական բաժնի վարիչ Բնկ. Ն. Մնացականյանի միջոցով։

** Կարմիր բլուրի պեղումները ղեկավարում է պրոֆ. Բ. Բ. Պետրովսկին։


*** Դվինի պեղումները ղեկավարում է պատմ. գիտ. թեկնածու Բնկ. Կ. Ղաֆազարյանը։



Նկ. 8

1. Արծաթյա գոտի Էրզրումից:
2. Արծաթյա գոտի Ախալցխայից:

Հայաստանում, առհասարակ, իշխող դասին պատկանող կանայք գործածել են այնպիսի գոտիներ, որոնց առաջին մասը (ճարմանդը) պատրաստված էր նուրբ արվեստով՝ արծաթից կամ ոսկուց, զարդարված գույնզգույն քարերով: Ծարմանդներ կրել են նաև հոգևորականները՝ եկեղեցական ծիսակառարության ժամանակ, միայն այն տարրերով յամբ, որ նրանց ճարմանդներն իրենց ծավալով ավելի մեծ էին: Ոսկերչական լավ աշխատանք է Պետական Պատմական թանգարանի № 1295 գոտու արծաթյա ոսկեջրած ճարմանդը, որն ունի երեք գորտանման հավելվածներ: Այդ ճարմանդի արծաթյա թերթիկը ծածկված է ոսկեթել հյուսվածքով՝ պատրաստված բուսական զարդանախշերով, որոնց կենտրոնում փայլում է մուգ կարմիր գույնի աղալը: Պետական Պատմական թանգարանում գտնվող մի այլ ճարմանդ (№ 637), նույնպես արծաթյա, ոսկեջրած, ամբողջովին զարդարված է վերադիր նշանն նախշերով և ծածկված է թանկարժեք գույնզգույն քարերով:



Նկ. 9

Արծաթյա ճարմանդ:

Թելի հյուսվածքի և հատիկի տեխնիկան կիրառվել է նաև Անուշիրանի արծաթյա կամ ոսկյա կազմեր ու տուփեր պատրաստելու ժամանակ: Մատենադարանում այգալիսի օրինակներ շատ կան: Հաճախ ձեռագրի կազմը ամբողջովին պատրաստվում է հյուսվածքի աշխատանքով, իսկ երբեմն այդ թել-հատիկավոր աշխատանքը խառը ձևով հանդես է գալիս դրվագման և փորագրական տեխնիկայի հետ միասին: Մաքուր թելի և հատիկի տեխնիկայով պատրաստված աշխատանքներից անհրաժեշտ ենք համարում հիշատակել երկու օրինակ: Դրանցից մեկը № 6785 ձեռագրի ավետարանի արծաթյա կազմն է, պատրաստված 1713 թվականին: Նրա վրա թելի աշխատանքով հյուսված են բուսական օրնամենտներ, ավետարանի շորս անկյուններում ամրացված են վերագիր ութ թևանի էմալապատ վարդեր, որոնք կազմին տալիս են գեղեցկություն: Թելի մաքուր աշխատանք է նաև № 6788 ձեռագրի արծաթակազմը, որը պատրաստված է 1782 թվականին էրզրում քաղաքում: Կազմի ամբողջ դաշտը ծածկված է խաղողի, նուա՛ն քանդակներով: Նյութական մնացորդները հաստատում են, որ միջնադարում Հայաստանի ոսկերիչներն առանձնապես թելի աշխատանքում կիրառել են բուսական քանդակներ, որոնց մեջ գերիշխում էին 8 և 6 թևանի վարդերը, խաղողի ողկույզը և նուա՛ն պատկերները:

Սևադապատման, արծնակիտման, ոսկեզօծման և ինկուստացիայի տեխնիկան.— Հայաստանի ոսկերչության մեջ թե՛ զարդերի և թե՛ հրերի արտաքին ձևավորման համար օգտագործել են սևադապատման, արծնակիտման և ինկուստացիայի տեխնիկան: Սևադապատման մեծ մասամբ կատարում էին արծաթյա իրերի, քաժակների, ափսեների, տուփերի, սափորների և երբեմն էլ կանացի լայն ապարանջանների և գոտիների վրա: Սևադապատման տեխնիկայի հնագույն լինելը հաստատվել է Թուրքակ-Վալեի պեղումներից հայտնաբերված սևադի փոշիի մնացորդով: Մեր ձեռքի տակ բավարար չափով

նյութ չլինելու պատճառով, չենք կարող ասել, թե այդ տեխնիկան որ դարձում ավելի գործածական էր, միայն 18-րդ դարից սկսած մեր ձեռքի տակ ունենք մեծ քանակությամբ սեաղապատած արծաթյա իրեր և զարդեր, որոնք պատ-րաստվել են թե՛ Արևմտյան և թե՛ Արևելյան Հայաստանի ոսկերիչների ձեռքով: Դրանք մեզ համոզում են, որ 18—19-րդ դարերում սեաղապատման տեխ-նիկան շատ զարգացած և հարգված ճյուղ էր ոսկերչության մեջ:

Սեաղապատումը երկարատև և կրկնակի աշխատանք է պահանջում: Որևիցե իր սեաղելու համար անհրաժեշտ էր լավ փորագրական աշխատանք: որքան նուրբ էր կատարվում փորագրությունը, այնքան հաջող էր լինում սեա-ղապատումը: Իրը կամ դարդը սեաղապատելու համար ոսկերիչը նախ և առաջ դրսի կողմից ոսկերչական նուրբ գրիչով խորը փորագրում էր ցանկա-ցած օրնամենտը՝ բուսական քանդակներ, դիմանկարներ կամ պատմական հուշարձաններ: փորագրության ժամանակ վարպետն ավելի խորացնում էր այն մասերը, որոնք պետք է սեաղով ծածկվեն, այնուհետև փորագրած մասերի վրա վրձինով քսում էր հատուկ հեղուկ, որից հետո խողովականման գործի-քով ամբողջ կտրվածքի վրա հավասար շափով ցանում էր սեաղի փոշին: Երբ իրն ամբողջովին ծածկվում էր սեաղով, այն դրվում էր հնոցի մեջ և պահվում էր այնքան, մինչև սեաղի փոշին հալվում և լցվում էր փորագրած մասերն ամ-բողջությամբ: Դրանից հետո ոսկերիչը հատուկ գործիքով (քերիչ) մաքրում էր իրի մակերեսից ամբողջ սև լաքը, մնում էր միայն փորագրած մասի սեաղը, որն արդեն հավասարված էր լինում քնդհանուր մակերեսին:

Սեաղապատած իրերից և զարդերից մենք ունենք քիչ նմուշներ, բայց դա չի նշանակում, որ այդ տեխնիկան միջնադարյան Հայաստանում տարածված չէր: Սեաղապատած իրերի կամ զարդերի սակավ լինելը պետք է բացատրել նրանով, որ մենք դեռևս միջնադարյան վայրերից քիչ տեղեր ենք պեղել, բացի այդ՝ պեղումների ընթացքում չեն գտնվել արծաթյա իրեր:

Հայաստանում ամենահնագույն շրջանի սեաղապատած զարդը, որ մեր ձեռքն է հասել, 1949 թ. Դվինի միջնաբերդի պեղումներից գտնված ոսկյա մատանին է, փիրուզյա ակով: Այդ մատանու երկու կողքերի զարդերը պատ-րաստված են սեաղի տեխնիկայով:

Սեաղապատման տեխնիկան կիրառվել է նաև ձեռագրերի արծաթյա կազ-մերը վարդարելու ժամանակ: Միջնադարյան ձեռագրերի արծաթյա կազմե-րից անհրաժեշտ ենք համարում այստեղ հիշել № 5651 ձեռագիր ավետարանը, որը գրված է 1333 թ. մոնղոլների ժամանակ, Վալոց ձորի մենաստան նորա-վանքում: Այս ավետարանի ներկա կազմը պատրաստված է ավելի ուշ՝ 17-րդ դարում: Ոսկերիչ վարպետը կազմի վրա կիրառել է մի քանի տեխնիկա, կազ-մի ամբողջ դաշտը փորագրված է և ապա սեաղապատված: Այն զարդարված է վերադիր ձուլածո զարդանախշերով և գույնզգույն ակներով: Հետաքրքիր աշ-խատանք է № 7775 ձեռագիր ավետարանի արծաթյա կազմը: Նրա առաջին և երկրորդ երեսները պատրաստված են դրվագման տեխնիկայով, և պատկեր-ված են խաղողի տերևների նման բուսաքանդակներ, շատ նման Տեկորի քան-դակներին: Կազմի փակելու մասը սեաղապատված փորագրություն է, որից պարզվում է, որ այն պատրաստված է վանեցի ոսկերչի կողմից: Սեաղապատ-ման տեխնիկան ամենից շատ տարածված և զարգացած է եղել 18—19-րդ դա-րերում՝ Արևմտյան Հայաստանում, հատկապես Վանում: Պետ. Պատմական թանգարանում կենտրոնացած են այդ դարերին վերաբերող մեծ քանակու-

թյամբ լարծաթյա իրեր ու զարդեր, որոնց վրա սևադի տեխնիկայով փորագրված են ոչ միայն բուսական քանդակներ, այլև պատմական հուշարձաններ, տեսարաններ և թագավորների, զորավարների ու պատմազիրների դիմանկարներ:



Նկ. 10

Արծաթյա սափոր, սևադապասած:

Խանգարանում կան գոտիներ 18—19-րդ դարերից. դրանցից են N° 2514 և 2329 արծաթյա գոտիները, կաղմված 12—16 քառակոզ արծաթյա տախտակներից, վրան փորագրած բուսական քանդակներ և ծածկված սևադով:

Ոսկյա և արծաթյա զարդերին ու իրերին արտաքին զեղարվեստական ձևավորում տալու համար նաև արծնակիտում (էմալապատում) էին: Արծնակիտման տեխնիկան Հայաստանում հանդես է եկել ավելի ուշ և զարգացել է հատկապես 17-րդ դարից հետո: Գոնե առայժմ Հայաստանում ավելի հին և վաղ միջնադարից չունենք արծնակիտման նմուշներ, սակայն Հայաստանի անմիջական հարևան Վրաստանում՝ Արմազիի պեղումների ժամանակ դամբարաններից հայտնաբերվել են արծնակիտած իրեր, որոնք պատկանում են 4—3-րդ դարերին (մ. թ. ա.):

Արծնակիտման և մասնավորապես միջպատային էմալի տեխնիկան զարգացած և շատ տարածված էր Ռուսաստանում: Ամենայն հավանականությամբ Վերջին դարերում այդ տեխնիկան մուտք է գործել Կովկաս և Հայաստան:

Արծնակիտման համար նախ վարպետն իրի արտաքին մասը հատուկ դործիքով քերում է, առաջացնելով անհարթություններ և զծիկներ. որից հետո էմալապատում է: Իսկ երբ չի ցանկանում իրի ամբողջ դաշտը ծածկել էմալով, այդ դեպքում առանձին շրջանակների մեջ՝ զանազան գույնի էմալներով պատրաստում է ցանկացած նկարը և ապա այդ շրջանակները ամրացնում իրի վրա:

Միջնադարում, բացի զարդերից ու իրերից, արծնակիտում էին նաև ձեռագրերի արծաթյա կազմերը: Այդպիսի տեխնիկայի նմուշ է № 7789 ձեռագրի արծաթյա կազմը, որի առաջին երեսը պատրաստված է դրվագման եղանակով և պատկերում է արևը, իսկ շորս անկյուններում վերադիր կապույտ ֆոնի վրա կան շորս առաքյալների դիմանկարներ: № 6767 ձեռագիր ավետարանի արծաթյա կազմի վրա նույնպես կիրառված է արծնակիտման տեխնիկան. այս ավետարանը գրվել է 1471 թ. Առեստ գյուղում և ավարտվել է խառաբաստովանքում:

18—19-րդ դարերում արծնակիտման տեխնիկան բավականաչափ զարգացած է եղել Ղարաբաղի Շուշի քաղաքում:

Արծնակիտման լավագույն նմուշներից պետք է համարել Շուշեցի ոսկերիչ ուստա Բադամի ձեռքով 19-րդ դարի վերջերին պատրաստված մի կոմպլեկտ, բաղկացած հետևյալ իրերից. մի ափսե՝ մեծ բաժակով, գինու փոքր բաժակներ, ծխախոտի տուփ, դաշույն, սափոր և գոտի: Այդ իրերի արծաթյա շենքը ծածկված է ամբողջովին մուգ կապույտ էմալով, նա ոսկեզօծված է աստղաձև և զարդարված է բուսական նախշերով, որոնց ծաղիկների տերևները ոսկեզօծ են, իսկ ծաղիկների թերթիկները լցրած են կարմիր, սպիտակ և կապույտ էմալներով, արտաքուստ նման փոքր ուլունքների:



Նկ. 11

Արծաթյա բաժակներ և տուփ, պատրաստված արծնակիտման (էմալի) տեխնիկայով:

18—19-րդ դարերում շատ տարածված էր դաշույնների դաստակների էմալապատման տեխնիկան: Այդպիսի տեխնիկայով պատրաստված լավագույն օրինակներ պահպանվում են Պետական Պատմական թանգարանում:

Արծաթյա կամ ոսկյա իրերին շքեղություն էր տալիս նաև նրանց վրա ուկնդենի ընդելուզումը: Հայ պատմիչները իրենց աշխատություններում խոսելով ոսկյա կամ արծաթյա զարդարանքների մասին՝ բազմիցս հիշում են լանկադին քարերով զարդարված կամարների, ապարանջանների, ականջի օղերի, ոսկեզօծ բաժակների, տփուկների, տուփերի, գլխի թասակների ու ձե-

ռազրերի կազմերի մասին: Հայ ոսկերիչները թագավորների և իշխանների պատվերով ազնիվ մետաղները զարդարում էին թանկագին քարերով, փղոսկրով և այլ նյութերով:

Փ. Բուզանգը հիշում է «ականակապ մարգարտազարդ» ոսկյա իրերի մասին: Հովհաննես Դրասխանակերտցին, խոսելով Աշոտի մասին, գրում է. «Այլ և Աշոտոյ երիցու որդւոյ արքայի, նորանշան իմն պատիւ յարգարեալ իբր օղապարիկ իմն երիվար գեղեցիկ զարդուք և ղինուք և պերճապաճոյճ երանգս ղգեստուց և կամար ականապատ ընդ մէջ ածեալ կացուցանէ զնս իշխան հայոց»¹:

13-րդ դարի պատմիչ Ս. Օրբելյանը Տարսայիճի մասին գրում է. «Զկամարն ի համակ ոսկւոյ բաղմագին ականբբ և մարգարտօք լցեալ տայր ածել ընդ մէջ նորա»²:

Մատենադարանի № 102 ձեռագրի հիշատակարանում կարդում ենք. «Քանզի զտիպս աւետարանին տեսանեմք նկարեալս ոչ միայն յոսկւոյ և արծաթոյ այլև յոսկերաց փղաց և կարմիր մորթով կազմեալ...»:

Նորվանքում 989 թվականին Հովհաննես գրչի գրած մի ձեռագրի կազմը ծածկված է փղոսկրով, որը հանդիսանում է արվեստի ամենանուրբ գործերից մեկը:



Նկ. 12

1. Արծաթյա բաժակ — ինկրուստացիայով:
2. Արծաթյա արկղիկ — ինկրուստացիայով:

Հնագույն շրջանում ինկրուստացիա է կատարվել ոչ միայն արծաթի, ոսկու, այլև բրոնզի, պղնձի և կավե իրերի վրա: Ինկրուստացիայի տեխնիկայի հնագույն նմուշներ են հայտնաբերվել 1948 թվականին Կիրովականում բացված Կուրդանից: Միջնադարյան քաղաք Դվինի պեղումների ժամանակ գտնվել

¹ Հովհ. Դրասխանակերտցի, էջ 198:

² Ս. Օրբելյան, էջ 423:

են ապարանջաններ, ականջօղեր՝ զարդարված թանկարժեք քարերով: Նման օրինակներ շատ ունենք մեր ձեռքի տակ, հատկապես՝ 18—19-րդ դարերին պատկանող կանանց զուտիներ, ճարմանդներ, կրծքի և գլխի զարդեր, որոնք միմյուրյուրյալ զարդարված են տարբեր դույնի թանկագին և հասարակ քարերով, մարջաններով: Հետաքրքիր ինկրուստացիոն աշխատանք է 18-րդ դարում պատրաստված արծաթյա բաժակը, որն ունի բարձր պատվանդան, արծաթյա դաշտի վրա ամբողջ բաժակին ամրացված են կեղծ փրուուզաներ: Միջնադարում հայ ոսկերիչները ձեռագրերի վրա նույնպես կիրառել են ինկրուստացիայի տեխնիկան:

Խոշոր նշանակություն ունեն նաև արծաթի իրերի ոսկեզօծումը: Արծաթյա իրերը ոսկեզօծում էին մի քանի ձևով. կային իրեր, որոնք ոսկեզօծում էին թե՛ ներսից և թե՛ դրսից, իսկ շատ հաճախ ոսկեջրած իրի վրա հատուկ գրիչով փորագրում էին բուսական կամ երկրաչափական օրնամենտներ, իսկ երբ անհրաժեշտ էր լինում՝ արծաթյա իրերի վրա փորագրում էին ոսկյա տառեր կամ բուսական քանդակներ:

Այսպիսով, կարող ենք եզրակացնել, որ ոսկերչությունը իր ձուլելու, դրվագելու, դրոշմելու (ճնշման), սևադի, արծնակիտման, ինկուստրացիայի ոսկեզօծման, վերջապես, թելի հյուսվածքի և հատիկավոր տեխնիկայով հին Հայաստանի զարգացած արհեստների թվին է պատկանել: Ոսկերիչ վարպետները ոսկյա, արծաթյա զարդերի ու իրերի վրա կիրառել են թե՛ այնպիսի օրնամենտներ, որոնք համապատասխանում էին տվյալ էպոխայի ազնվական դասի պահանջներին, և թե՛ ժողովրդի աշխատանքի հետ կապված զարդանախշեր: